

# Carta a los Hebreos

## Kjibokwo ère tak hebreoga kong

### Kjibokwo ère sorë

Kjibokwo ère tak beno pjang hebreoga mär Jesús go ìi kong. Hebreoga ìi, e kowëba Israel tjëyoga, e kowëba judíoga bakoe. Epga tjëyo kjirinaso, gueniyo kowëba oblë oblë eni.

Kjibokwo ère taga èrë miydëy ìlëme. Kjone kjone tjlë ga taga Pablorë ìe. Kjone kjone tjlë ga taga Bernabérë ìe. Kjone kjone obi tjlë ga taga Apolosdë ìe. Gueniyo taga èrë miydëy yötso ìlëme.

Eshko dbaryo ga hebreoga mär löng Jesús go ìi shdungoba ara. E kjishko ga kjone kjone Jesús rayë woydë, mär ber löng kjok ìlgwekklo tara Moisésdë ìi go iröng obi wlo. No kjone kjone to löng tjlë ga èye döya Jesúsde ga ä, ga woyde ga raye ìe. E kjishko ga kjibokwo ère taraba, epga dbokjrë e go wlo.

Dënashko ga Sbö tjlëno nopga kong ba tjlokwo lagaga go, ba parkagaga kjok dogo so go bako, gueniyo eshko dbaryo ga tjlëno ba Wa Jesús go ìi taraba ba kong. Dënashko ga Sbö tjlë ba nopga kong ga ìlono ga tjlokwo twe ba kong tjanglën, ber pjíú, tjlokwo bäm go ìi kjinmo ìe, ga shäryara eni Jesús go ìi taraba ba kong. Owa pjang bi go ìi löya Sbörë kjok ìlgwekklo tara Moisésdë ìi kjishko ìlëm, gueniyo Jesús wolono pjlaraso, owa pjang bi go kës ìi löya Sbörë ber dret wlo, ga shji ie ber löng pjlo bek ba bokso e kjishko ga pjíú ìi taraba ba kong. Ìlëbo shäryara Jesúsde bi kong ìi kjishko ga shji äär Sbö bokshto kjok dogo ba pjíú wlo ìi taraba ba kong. Eni ga epga icharaba mär Jesús go jlokoyo, ìlëbo wen ba kong owa gueniyo.

### Sbö Wa, e twjwlo ara, Sbö parkagaga kjok dogo so kjinmo

**1** Dënashko ga Sbö tjlëno ba tjlokwo lagaga oblë oblë kong, ìe lok bi tjlapgaga kong wlo. Tjlëno eni kop ara, ga tjlëno oblë oblë bakoe. <sup>2</sup>Gueniyo ga dbar pjir ìe dbaryo eerishko ga ba Wa ichara tjlëno bi kong om go shara. Ba Wa ìi go ga kjok shäryara Sbörë uunkong, ga ìlono ga ìlëbo tjeng kës ìi ber baíya. <sup>3</sup>Ba dbo kälä, e so Sbö ìi kjoyo, e so e kjoyo kjishko. Ìlëbo kës tjeng ba wloshko, ga iche ba tjlokwo dbo ara ìi go, srer ìlëm wlo. E wolono, ìlëbo owa shäryara nopgarë ìi potjwëkklo. E irgo ga öötong beno sök Sbö orkwo këlëkong kjok dogo. <sup>4</sup>Eni ga öötong sök twjwlo ara, Sbö parkagaga kjok dogo so kjinmo, ga ba ko twjwlo ara ba kjinmo bakoe.

<sup>5</sup>Miydëy eni, ìlëbo ìara Sbörë ba kong ìi kjishko. Tjlëno ga

«Pja bor Wa;

eeri ga tja öötong beno sök bop Data.»

Ľara eni ba Wa kong, gueniyo Ľara ba parkagaga kjok dogo so kong eni ĽĽeme. Ga tĽĽeno obi ga

«Tja ber sök ba Data;

era ber sök bor Wa.»

<sup>6</sup>Ga ba Wa Ľi ichara kjok ěre kĽing goshko ga tĽĽe ga

«Bor parkagaga kjok dogo so,

bor Wa, e poshrězĽi uunkong.»

<sup>7</sup>Ga tĽĽeno ba parkagaga kjok dogo so kĽiĽshko. TĽĽeno ga

«Ba parkagaga kjok dogo so,

e shĽryara beno so pĽĽluk kĽoyo,

so iök kĽoyo bakoe.»

<sup>8</sup>Gueniyo tĽĽeno ba Wa kong ga

«Pja Sbö,

pja ber sök no pĽĽluyo Ľyado wĽo,

ga kjok ĽĽgwep beke.

<sup>9</sup>ĽĽebo pĽĽĽ shĽryěbashko ga pja wopĽĽĽu eshko.

Gueniyo ĽĽebo owa shĽryěbashko ga pja woydě ara eshko.

E kĽiĽshko ga pja ioror beno sök wopĽĽĽu,

bop pĽeyoga Ľöng kěs Ľi kĽinmo.

Tja bop Sbö ĽĽökoyo.»

<sup>10</sup>Ga tĽĽeno ba kong obi ga

«TĽĽlapga, kjok ěre dĽmĽrshko ga

kjok uunkong shĽryaga pĽarě,

kĽopkwo, kĽlung bakoe.

<sup>11-12</sup>ĽĽebo kěs ěre pĽir,

gueniyo pĽara ber sök Ľyado.

Shwong kěguěshko ga dbuy,

ĽĽeno ame kĽiĽshko.

Pja opshĽryě ĽĽebo kěs ěre tĽok eni wĽeni.

Gueniyo pĽara kĽĽopswě ĽĽem,

pja ber sök Ľyado.»

<sup>13</sup>Ga tĽĽeno ba kong obi ga

«Pja tek wĽar ber sök bor orkwo kěĽěkong,

ĽĽar jong bop moskwoga zanor pĽir guing,

eshko ga iěr ber tĽjeng bop wĽoshko.»

Ľara eni ba Wa kong, gueniyo Ľara ba parkagaga kjok dogo so kong eni ĽĽeme.

<sup>14</sup>Epga sěyaga to Ľöng parkě Sbö kong eröe. Ga epga iche nopga dĽr wĽo Ľi kĽjimtě.

### Sbö tjlökwo woyotjliy yötso

**2** <sup>1</sup>Woyde ga Sbö tjlökwo kuroy li woyotjliy yötso, shji opkwë sira sira ey dwayo llëm wlo. <sup>2</sup>Dënashko ga Sbö tjlökwo söra ba parkagaga kjok dogo sorë bi tjlapgaga kong, ga llëye lara ba kong li, e kolako. Ëye omkolono llëm ga shduna Sbörë beke. <sup>3</sup>Shji dâr sorë tjlökwoyo lira, e kësbang, wolësoe. ¿Eni ga e kjrëy llëm ga shji shdüya eni llëm sorëro? Tjlökwo ëre laga Tjlapga Jesúsdë bäm go. E irgo ga ba tjlökwo kugaga omloño bi kong eni bakoe. Miydëy e go ga e beke. <sup>4</sup>Ga llëbo iydëba llëm wleniyo shäryara Sbörë bi kong oblë oblë, ga ba Sëya ichara kjok miydë twë bi kong, woydara Sbörë sorë li eni. Shäryara eni, miydëy e go wlo ga tjlökwo li beke.

### Jesús opyono beno so ba pjeyoga kjoyoe

<sup>5</sup>Llono ga dbar tjwe kjwara oblë li lörwarë bomi kong. Eshko ga ba parkagaga kjok dogo so ie Sbörë kjok llgwek llëme. <sup>6</sup>Llëbo tak pjang Sbö tjlökwo go, dbar lërwa löng li kjishko. Tjlë ga

«No tjwlo ara llëme.

¿Eni ga woyotjlip ara ega?

¿Tjwlo ara lëp ega?

<sup>7</sup>Bäm go ga iorop beno tjwlo

bop parkagaga kjok dogo so dorko.

E irgo ga iorop beno kësbang, tjwlo ara,

<sup>8</sup>iorop beno shäng llëbo tjeng kës li ichaga bakoe.»

Miydëy e go ga llono ga llëbo tjeng kës li iche no lirë. Gueniyo eerishko ga llëbo iche llëm wleniyo tjok obi. <sup>9</sup>Llëye weno Jesús tjok li miydëy pjilúe. Bäm go ga iara Sbörë beno tjwlo ba parkagaga kjok dogo so dorko. Ga Sbö wopjlu li kjishko ga ichara wolon bi kjishko. Ga wolono kjishko ga iara beno kësbang, tjwlo ara.

<sup>10</sup>Ba go ga llëbo tjeng kës li shäryara Sbörë, ga beno tjeng ba kong uunkong. Llëbo owa ichara wen ba kong ara. E poshäryara ber nopga ara döga wlo eni. Sbö omshäryono eni, woydara eni kjishko, ga shäryara beke. <sup>11</sup>Jesús, nopga iara beno tjeng dboy Sbö kong li, e Data kjilaraso. E kjishko ga epga lökyokjre Jesúsdë llëm, kowe ba pjeyoga. <sup>12</sup>Tjlëno Sbö kong ga

«Bop roy lër bor pjeyoga kong.

Pja poshrër ara, epga tön löng lishko.»

<sup>13</sup>Ga tjlëno obi ga

«Tja mär Sbö go.»

Ga tjlëno obi ga

«Tja shäng bor wapga twara Sbörë bor kong li tjok.»

<sup>14</sup>Iara beno ba wapga li, e nopga, ga nopga ichaga wolon li, e Ä, ga uunkong tjeng Ä wloshko e kjishko. E kjishko ga Jesús öotong beno shäng no, ga wolonoe. Shäryara eni, Ä zäya wlo, <sup>15</sup>nopga döya Ä wloshko dwayo wlo bako, ber löng ba wolon li bangkjre ame wlo. <sup>16</sup>Jlökoyo ga e shrono shäng Sbö parkagaga

kjok dogo so li kjimtaga wlo llēm, shrono shäng Abraham tjëyoga kjimtaga. <sup>17</sup>E kjishko ga iara Sbörë beno shäng ba pjeyoga dik, llëbo wen ba kong lok kës li wen ba kong eni wlo, epga sorë miyde pjir wlo. Eni ga songe le ga pjlu, ga parkë syöshtaga kësbangyo wleni ba kjishko ga pjlu bako, e äär ber llëbo owa shäryara li potjwleklo wlo. <sup>18</sup>Ga öör shäng song, tjina Äre ara, llëbo owa shäryë wlo lara kuzong ga nopga tjliya Äre enishko ga epga kjimte ga pjlu.

**Jesús tjwlo ara, Moisés kjinmo**

**3** <sup>1</sup>E kjishko ga pjeyoga, pjäy rokara Sbörë, iara beno tjeng dboy ba kong li, Jesús woyotjliiz iyado. Ichara Sbörë ba tjlokwo roy le bi kong li e. Syöshtaga Sbö kong bi kjishko kësbangyo li e bakoe. Shji mär ba go ley eni. <sup>2</sup>Jesús iara Sbörë beno shäng parkë ba kong, ga parkono pjlu, Moisés parkono pjlu Sbö nopga kong sorë ga eni. <sup>3</sup>Gueniyo Jesús, e tjwlo ara, Moisés kjinmo, domer u shäryaga tjwlo ara, u shäryara li kjinmo wleni. <sup>4</sup>U tjeng kës li shäryaga tjok, gueniyo llëbo tjeng kës li shäryaga Sbörë. <sup>5</sup>Moisés parkono Sbö nopga kong pjlu, parkaga tjwlek shäng pjir wleniyo dik. Eni ga llëye shäryara li beno llëbo wen llono li jyäglö. <sup>6</sup>Gueniyo Cristo, e Sbö Wa, ga parkë shäng Sbö nopga ichaga. Tjawa tjle ga shji mär ba go, ga koshëy iyado ley eni. Shäryëy eni jlökoyo wleni ga shji ber ba nopga, so u shäryara li kjoyoe.

**Woyde ga shji mär Sbö go äär jong ba dbo go**

<sup>7-8</sup>E kjishko ga Sbö Sëya tjle ga  
«Eeri ga Sbö tjlokwo kumi wleni  
ga kjrozia.

Bomi tjlapgaga tek dënashko so,  
Sbö kolara lok llēm,  
llëye kuya woydë llēm bakoe.

Pjäy opshäryë baïya dik llëme.  
Epga löng kjok dogro no llëmshkoshko ga  
Sbö tjliina lok.

<sup>9</sup>Llëbo shäryara Sbörë kës li ina lok öötong lu pjloglo sak pkëng (40).  
Eni ëmdë ga Sbö tjliina lok ara.

<sup>10</sup>E kjishko ga Sbö iirkono ara ba kong,  
ga tjle ga “Jeno löng iyado, jëk lok woydë bor tjok llëme” le.

<sup>11</sup>E kjishko ga Sbö iirkono ara ba kong,  
ga tjle jlökoyo ga “Epga äär löng bor woshtozlong kjokyo llëme” le.

<sup>12</sup>Pjeyoga, pjäy sjëke! Sbö, e sök iyado. Eni ga llëbo owa iëmi äär ber tjeng bomi pjlushko llēm, Sbö rayëmi llēm wlo. <sup>13</sup>Dbar kjwobi go ga pjäy ëng kjimtos dbokjre dey. Dbar kowëy «eri» li pjang obishko ga pjäy opshäryos eni, pjäy jyäpgwe llëbo owa lirë llēm wlo, Sbö rayëmi llēm wlo. <sup>14</sup>Shji mär löng Cristo go bäm go sorë ga woyde ga shji mär ber löng ba go eni äär jong ba dbo go. Shäryoroy eni ga shji äär ber löng ba tjok iyado, <sup>15</sup>tak pjang Sbö tjlokwo go sorë li eni. Tjleño beno eni:

«Eeri ga Sbö tjłökwo kumi włeni ga  
 kjrozĩa.  
 Bomi tjłapgaga tek dēnashko so,  
 Sbö kolara łok łłēm,  
 łłeye kuya woydē łłēm bakoe.  
 Pjāy opshāryē baīya dik łłēme.»

<sup>16</sup>¿Nopga öör löng Sbö tjłökwo kuno, gueniyo kolara łok łłēm li ē? Nopga shira Moisésdē tek Egipto kjokyo dwayo li epga om go. <sup>17</sup>¿Sbö iirkono öötong lu pjłogłō sak pkēng (40) li ē kong? Nopga łłēbo owa shāryono, ga wołono tjeng kjok dogro no łłēmshko li kong. <sup>18</sup>«¿Epga āār löng bor woshtozłong kjokyo łłēme» lara Sbörē jłökoyoshko ga ē layde shāng? Nopga ba tjłökwo kołono łłēm li layde. <sup>19</sup>Miydēy e go ga epga öötong łok łłēm, epga mār Sbö go łłēm kjishko.

### Sbö nopga āār ber löng ba woshtozłong kjokyo

**4** <sup>1</sup>Tjłökwo lara Sbörē ba kong łok jłökoyo li beno bi kong bakoe. Shjira ie woydē āār ber löng ba woshtozłong kjokyo bakoe. E kjishko ga shji sjēk, shji āār ber löng eshko włō. <sup>2</sup>Sbö tjłökwo pjłú li kuroy wēłē, epga omkuno dik, gueniyo mār Sbö go łłēm kuzong ga beno ba kong ga łłēno łłēme. <sup>3-5</sup>Shji āār ba woshtozłong kjokyo włō ga woyde ga shji mār ba go, lara Sbörē sorē li eni. Tjłēno beno eni:

«E kjishko ga Sbö iirkono ara ba kong,  
 ga tjłē jłökoyo ga “Epga āār löng bor woshtozłong kjokyo łłēme” ĩe.»  
 Gueniyo łłēbo tak pjang Sbö tjłökwo go. Tjłē ga «Dbar kjäk (7) ga ba pak shāryara pjirshko ga woshtonoe.» E irgo ga tjłē ga «Epga āār löng bor woshtozłong kjokyo łłēme» ĩe. Miydēy e go ga kjok shāryara Sbörē pjirshko ga woshtozłong kjokyo lara li, e shāryak pjir tjān.

<sup>6</sup>Miydēy e go ga no kjone kjone āār ba woshtozłong kjokyo ga pjłúe. Gueniyo nopga Sbö tjłökwo pjłú li kuno bām go li öötong eshko łłēm, kolara łok łłēm kjishko. <sup>7</sup>E kjishko ga lu kop ara irgo ga Sbö tjłēno David kong. Eshko ga dbar iara beno kjwara obi, ga kowara «eeri». Eshko ga tjłökwo lara jłökoyo loror bomi kong tjān li, e lara nopga löng eshko li kong jek obi. Tjłē ga

«Eeri ga Sbö tjłökwo kumi włeni ga  
 kjrozĩa.

Pjāy opyē ber löng łłeye kumi woydē łłēm włeni łłēme» ĩe.

<sup>8</sup>Epga iara Josuérē beno löng woshtē jłökoyo kjwe ga dbar iara Sbörē kjwara obi łłēme. <sup>9</sup>Miydēy e go ga łłono ga ba nopga kong dbar twe Sbörē kjwara obi, woshtē jłökoyo włō, Sbö woshtono dbar kjäk (7) łishko sorē ga eni. <sup>10</sup>Eshko dbaryo ga ēye öötong löng eshko ga parkē ame, ber löng woshtē jłökoyo, Sbö woshtono sorē ga eni. <sup>11</sup>E kjishko ga shji drön ēē, shji āār eshko włō. Łłēm ga shji kjone kjone Sbö kolē łłēm, Israel tjēyoga dik, ga shji āār eshko łłēme.

<sup>12</sup>Sbö tjłökwo, e sē, dbo ara bakoe. Shji oblē shorkek dröng kowo stek kar kar włeni go ga dröng li opzrēk rongē. Sbö tjłökwo li, e so dröng e

kjoyoe. Opzrëk rong, kjlay bi pjłúshko. E go ga shji wotjłik pjłúre, de owa, e miydëy wëłëe. <sup>13</sup>Llëbo jney, iga Sbörë llëm wlo ga äe. Llëbo uunkong iyä wëłë, ga llono ga shji iche ba dboryë, llëbo shäryoroy kës li kjishko.

### Jesús, e syöshtaga Sbö kong bi kjishko kësbangyo

<sup>14</sup>Jesús, e Sbö Wa. E öötong sök kjok dogo. Syöshtaga Sbö kong bi kjishko kësbangyo li e. E kjishko ga shji mär ba go lëy kuzong ga woyde ga shji mär ber löng ba go jłokoyo. <sup>15</sup>E tjłina Äre ara, llëbo owa shäryë wlo lara, shji tjłiya Äre sorë ga eni. Gueniyo era llëbo owa shäryono llëme. E kjishko ga shji sorë li miyde shäng pjłú, ga shji dbo ara llëmshko, shji songshko ga shji songe le ga pjłúe. <sup>16</sup>E kjishko ga shji jek äär Sbö bokshto lan ba tjok wlo, llëye bangkjrëy llëm wleni, shji woyde ara kjishko. Eni ga shji songshko ga shji songe le, ga shji kjimte ba wopjłú li kjishko.

**5** <sup>1</sup>Syöshtagaga Sbö kong Israel tjëyoga kjishko këskesyo kjrara Sbörë kjłobi nopga li tjreko dwayo, parkë Sbö tjok, nopga li kong wlo, öng zröya, sho suya, llëbo owa shäryara nopgarë li kjishko wlo bakoe. <sup>2</sup>Nopga li kjok miydë ara llëm, ga olö ga llëbo shärye lok owa, dbo ara llëm kjishko. Eshko ga songe le syöshtagaga lirë ga pjłú, epga dbo ara llëm eni bako kjishko. <sup>3</sup>E kjishko ga öng zröya, sho suya, llëbo owa shäryara nopgarë li kjishko dö llëm, shärye eni, llëbo owa shäryara epgarë om go li kjishko bakoe.

<sup>4</sup>Pak ëre tjwłö ara. Gueniyo ëye opyë pak ëre shäryë om go llëme. Woyde ga rokaga Sbörë, Aarón rokara sorë ga eni. <sup>5</sup>Cristo opyono pak tjwłö ara ëre shäryë om go llëm bakoe. Sbö tjłëno ba kong ga

«Pja bor Wa;

eeri ga tja öötong beno sök bop Data.»

<sup>6</sup>Ga tjłëno ba kong obi ga

«Pja ber shäng syöshtaga iyado wlo,  
Melquisedec dik.»

<sup>7</sup>Jesús shäng kjok ëre kjing go obishko ga miyde ga Sbö dbo ara, e döya eshko dwayo wlo, wolon llëm wlo. E kjishko ga kjłoshtono ba kong jłokoyo, slatong ara boryo go. Ga Sbö bangkjrara ara kuzong ga llëye lara li kura.

<sup>8</sup>Gueniyo e Sbö Wa ëmdë ga llëbo weno ba kong owa ara kjishko ga oppino Sbö kolë jłokoyo. <sup>9</sup>Ga llëye woydara Sbörë shärye wlo li shäryara uunkong pjirshko ga öötong beno sök ba kolagaga uunkong li döga, epga ber löng së iyado wlo, <sup>10</sup>ga iara Sbörë beno shäng syöshtaga kësbangyo, Melquisedec dik.

### Shji Sbö rayë llëme

<sup>11</sup>Llëbo lërwa woydë bomi kong ara ëre kjishko, gueniyo lërwa wlo ga kjang, pjäy kä kjang kjishko. <sup>12</sup>Pjäy mär löng Jesús go dbar kop ara tjän. Pjäy oppino pjłú kjwe ga eerishko ga pjäy opyono beno löng no pingga. Gueniyo Sbö tjłokwo kjrëmi löng li llë loklo miydëmi löng llëm obi. Woydëmi ga pjäy pıya oblërë tjłokwo wëłë go eröe. Kjwozirga löng nä ië wleniyo, e dli uë woydë llëme. Pjäy so e kjoyo, tjłokwo kjang li kumi woydë llëm kjishko.

<sup>13</sup>Nopga so kjwozirga löng nä ië kjoyo li, e jëk löng pjlo bek sorë li miydayde lök llëm obi. <sup>14</sup>Gueniyo tjlokwo kjang li, e dli wleni, ga nopga so këkboga kjoyo li, e opping ara e go, ga llëbo pjluë, de owa, e miyde löng pjluë.

**6** <sup>1-2</sup>Bäm go ga tjlokwo laraba bomi kong ara. Cristo tjlokwo wëlë li laraba bomi kong. Llëbo owa shäryë löng li, e rayë sorë, shji wolon llëm wlo, e laraba bomi kong. Shji mär Sbö go sorë, e laraba bomi kong. Shji wë sorë, e laraba bomi kong. Shji orkwo ië ëng kjing go sorë, e laraba bomi kong. Nopga wolono löng li woshre iröng obi sorë, e laraba bomi kong. Llonno ga nopga shdüya Sbörë iyado wlo sorë, e laraba bomi kong bakoe. Tjlokwo uunkong ëre laraba bomi kong pjir tjän. Gueniyo woyde ga e lanyotkëy ame, shji opping tjlokwo kjang li go dey, nopga wotjlik këkboga dik wleni. <sup>3</sup>Woyde Sbörë wleni ga shäryë eni.

<sup>4-6</sup>Ëye tjlokwo li kjrono, ga rayara ga rokëy iröng obi ber löng Sbö tjok ga äe. Llëbo owa shärye löng li, e owa jlöe le ame, ga raye ame bakoe. Llëbo twara Sbörë ba kong li kjrara lök tjän. Epga ëng dowlëno Sbö Sëya tjok. Miydara lök pjir tjän ga Sbö tjlokwo, e pjluë. Sbö Wa tjwe iröng obi dbo ara go sorë, e miydara lök pjir bakoe. Eni ga Sbö Wa li rayarashko ga e zröra lök lök pjang kjlös go jek obi wleni, ga iara lök beno shäng joywëba wlo bakoe.

<sup>7</sup>Kjok buk kjrina. Shunyo shrë ba kjing goshko ga di li shura klung sho lirë, ga dwla botjyono pjluë, nopga parkë löng eshko li kongshko ga Sbö ber wopjluë kjok li tjok. <sup>8</sup>Gueniyo e wen shkë sho, kjlo sho oblë oblë llëno llëm wleniyo ga Sbö ber wopjluë ba tjok llëme. Llonno ga e sukoba pjire.

<sup>9</sup>Pjeyoga, tjawa lan bomi tjok eni ëmdë ga miydërwa ga pjäy opshäryë owa eni llëme. Ëye döktong ga woyde ga llëbo shärye pjluë. Ga miydërwa ga pjäy omshäryë eni. <sup>10</sup>Sbö woydëmi ara kjishko ga ba nopga kjimtoromi ara, ga shäryëmi löng eni obi. Sbö wotjlik bek iyado, ga llëbo shäryëmi löng li woyojeya llëme. <sup>11</sup>Woydërwa ga pjäy omshäryë eni jlokoyo, äär jong llëbo koshëmi löng li shäryono pjir guing. <sup>12</sup>Woydërwa ga pjäy opyë löng shmi jong wleni llëme. Ëye kwleya mär Sbö go llëm ga llëbo twe Sbörë ba nopga kong lara li kjre lök jlokoyo. Woydërwa ga pjäy omshäryë eni bakoe.

### Tjlokwo lara Sbörë jlokoyo li, e shäryë eni

<sup>13</sup>Ëye tjwlo ara Sbö kjinmo llëme. E kjishko ga Sbö tjläno Abraham kong jlokoyo dënashko ga tjlokwo li lara ba ko om go li go. <sup>14</sup>Eshko ga tjlä ga «Pja kjimtër ara. Bop tjëyo tek ber bop irgo li iër ber shdär träk llëme» le. <sup>15</sup>Kuya ga beno shäng ba koshë wopjluë, ga llëye lara li kjrara beno ba kong. <sup>16</sup>Nopga tjlokwo lë oblë kong jlokoyoshko ga tjlokwo le oblë tjwlo ara ba kjinmo li ko goshko, ber ba miydaga wlo. Shäryara eni ga jlöe lëba. <sup>17</sup>Eni ga Sbö tjläno jlokoyoshko ga woydara ga miydëba ga tjlokwo li shärye jlokoyo, ga kjlopswe llëme. E kjishko ga tjlokwo li lara ba ko om go li go. <sup>18</sup>Sbö jyörkë llëme. Llëye le jlokoyo li, e shärye kjluwe. Llëye le ba ko go li, e shärye kjluwe bakoe. Ga shji töktong ba shwoy, ga rokoroy ba kong ga shji döya. Eni ga miydëy ga llëye lara li shärye eni kuzong ga shji beno löng wopjluë. <sup>19-20</sup>Eni ga miydëy pjluë ga llëye koshëy löng li, e shäryë

eni. E kjishko ga shji wotjlik oblë oblë llëm, shji wotjlik ber löng kjrinaso eröe. Shji mär ber löng Jesús go. E öötong sök Sbö boksho kjok dogo bi bäm go, ga beno shäng syöshtaga kësbangyo iyado bi kjishko, Melquisedec dik.

### Syöshtaga Sbö kong ko Melquisedec

**7** <sup>1</sup>Melquisedec, e dënashko ga Salem so pjluoyo, syöshtaga Sbö Tjwłö Kësbangyo kong ba pjeyoga kjishko bakoe. Pjlara ga Abraham öör shäng ëngkwë pjluoga oblë tjok, ga zanae. E irgo ga jek shäng irbo, to ba ushko wlo ga wlojkrara Melquisedecde, ga tjłeno beno pjlu ba kong. <sup>2</sup>Eshko ga llëbo włena Abrahamde kës li shtara äär ba sakyo (10) go, ba sakyo (10) go, shira kjrina kjrina, ga twara ba kong. Melquisedec, e no pjluoyo, llëbo pjlo bek sharyaga li loklo. Ga Salem, e włep loklo. Eni ga kowëba Salem so pjluoyo li, e beno no pjluoyo, nopga iaga ber löng włep loklo. <sup>3</sup>Data ë, mekë ë, kjokëga ë, e miydëy llëme. Weno buk llonoshko, wołono llonoshko, e miydëy llëm bakoe. Eni ga beno syöshtaga iyado, Sbö Wa dik.

<sup>4</sup>E tjwłö kjöm li woyotjłizia. Abraham, e bi tjłappa tek dënashko so tjwłö ara anmoyö ëmdë ga pjluoga zanashko ga llëbo włena kës li twara ba kong kjrina. <sup>5</sup>Syöshtagaga Leví tjëyo lira, llëbo tak pjang kjok llgwekklo tara Moisésde li go ba kjishko. Tjłë ga Abraham tjëyoga llëbo włëkshko ga woyde ga shte lok, ga äär ba sakyo (10) go, ba sakyo (10) go ga shiya kjrina kjrina, ga twe ba kong lok, uunkong li pjeyoga dö gueniyo. <sup>6</sup>Gueniyo domer li, e Leví tjëyo llëme. Ga Sbö tjłeno jłokoyo li, e beno Abraham kong. Eni ëmdë ga llëbo włena Abrahamde li, e twara ba kong kjrina, ga kar tjłeno beno pjlu ba kong. <sup>7</sup>Miydëy ga ëye tjłeno beno pjlu oblë kong ga e tjwłö ara ba kjinmo.

<sup>8</sup>Llëbo twëba syöshtagaga Leví tjëyo kong eni. Gueniyo miydëy ga llono ga epga wołon. Domer kong llëbo twara Abrahamde li, era wołono sorë, llonoshko, e tak pjang Sbö tjłokwo go llëme. E kjishko e sök së obi włeni. <sup>9-10</sup>Tjwłö shigaga li, e Leví tjëyoga, ga Leví, e Abraham tjëyo. Abraham wlojkrara domer lirëshko ga Abraham wapa llëm obi. Eshko ga Leví, ba tjëyoga kës, e tjeng Abraham tjok obi włeni. E kjishko ga llëbo twara Abrahamde ba kongshko ga epga omtwono ba kong włeni bakoe.

### Jesús, e Melquisedec dik

<sup>11</sup>Kjok llgwekklo twara Sbörë nopga li kongshko ga Leví tjëyoga iara beno löng syöshtaga ba kong nopga li kjishko. Eshko ga domer iara beno syöshtaga kësbangyo bäm go li, e Aarón. Gueniyo ëye ie syöshtaga eniyorë ber pjlo bek Sbö bokso ga äe. E kjishko ga syöshtaga woydara oblë włeniyo, gueniyo Aarón dik llëm, Melquisedec dik shara. <sup>12</sup>Eni ga syöshtaga bäm go włeniyo li kje Sbörë, äska ie ber oblë włeniyo wlo ga woydara ga kjok llgwekklo bäm go włeniyo li kje bako, ga äska ie ber oblë włeniyo. <sup>13-14</sup>Syöshtaga oblë włeniyo tak pjang Sbö tjłokwo go ëre, e bi Tjłappa Jesús. Gueniyo era Leví tjëyo llëme. Miydëy pjlu ga e Judá tjëyo, ga epga iara Moisésde parkë syöshtaga Sbö kong öng sho sukklö jong lishko llëme.



<sup>15</sup>Syöshtaga weno shäng kjłara oblë wleniyo, Melquisedec dik. Uunkong ère miydëy wëllë e kjışhko. <sup>16</sup>Kjok ïlgwekkło ïi tjłë ga èye äär ber shäng syöshtaga wło ga woyde ga e Leví tjëyo. Gueniyo Jesús öötong shäng syöshtaga e kjışhko ïlëme. E öötong shäng syöshtaga, e wołon ame kjışhko, <sup>17</sup>tak pjang Sbö tjłokwo go sorë ïi eni. Tjłëno beno eni:

«Pja ber shäng syöshtaga ïyado wło,  
Melquisedec dik.»

<sup>18-19</sup>Kjok ïlgwekkło tek dënashko so ïi, èye ie ber pjło bek Sbö bokso ga äe. E ïlëno ïlëm wleni. E kjışhko ga iara Sbörë beno tjwłö ame, äska iara beno oblë, pjłú ba kjinmo. Ère go ga eerishko ga shji äär ber löng Sbö bokshto, ïan ba tjok wło ga pjłúe.

<sup>20</sup>Sbö om go tjłëno jłokoyo, Jesús kjışhko. Tjłëno eni, syöshtaga tek dënashko so ïi kjışhko ïlëme. <sup>21</sup>Jesús iara beno shäng syöshtaga ïishko ga tjłë ga

«Tjłapga tjłëno jłokoyo,  
ga opkjłopswë ber wotjłık oblë ïlëme.  
Tjłë ga

“Pja ber shäng syöshtaga ïyado wło” ïe.»

<sup>22</sup>Miydëy e go ga tjłokwo tjaglën ère ie Jesúsde ber pjłú, tjłokwo bäm go ïi kjinmo.

<sup>23</sup>Syöshtagaga tek dënashko so ïi arae. Èye parkë ber löng ïyado wło ga ä, epga uunkong wołon kjışhko. <sup>24-25</sup>Gueniyo Jesúsda sök ïyado, ga ber shäng syöshtë Sbö kong, nopga mär ba go äär Sbö bokshto wło ïi kjışhko ïyado. E kjışhko ga epga döya ber löng ïyado wło ga pjłúe.

<sup>26</sup>Syöshtaga kësbangyo woydëy wleniyo ïi e. E jëk shäng pjło bek ïyado, pogo ïlëye dret Sbö bokso, nopga owa dik ïlëme. Ga iara Sbörë beno shäng dboy ba kong, söra öötong sök kjok dogo, iara beno tjwłö ara, ïlëbo tjeng kës ïi kjinmo. <sup>27</sup>E syöshtagaga këskesyo oblë dik ïlëme. Tek bäm goshko ga öng zröya dbar kjwobi go, ga sho suya, pjë drete. Bäm go ga shärye eni, owa shäryara om go ïi potjwłëkkło. E irgo ga shärye eni, owa shäryara nopgarë ïi potjwłëkkło bakoe. Jesúsda opshäryë eni ïlëme. E optwono pjłaraso, beno ïlëbo owa shäryara nopgarë kës ïi potjwłëkkło. <sup>28</sup>Domerga iara kjok ïlgwekkło ïirë beno löng syöshtagaga këskesyo ïi, e dbo ara ïlëm, jëk löng pjło bek ga äe. Gueniyo kjok ïlgwekkło ïi twara Sbörë irgo ga tjłokwo ïara oblë jłokoyo. E go ga ba Wa iara beno shäng syöshtaga kësbangyo ïyado wło. Era öötong beno pjło bek ïyado.

### Syöshtaga kësbangyo oblë wleniyo, tjłokwo oblë wleniyo

**8** <sup>1</sup>Ïlëye ïër shäng bomi kong ïi eni. Shji syöshtaga kësbangyo sök kjłara. E öötong sirkeno sök kjok dogo, Sbö orkwo këlëkong, shtoyo tjwłö ara anmoyö ïishko, <sup>2</sup>ga parkë shäng Sbö u jong eshko ïi roshko. U ïi shäryaga Tjłapgarë, shäryaga norë ïlëme.

<sup>3</sup>Syöshtagaga këskesyo uunkong iara beno löng ïlëbo twe Sbö kong, öng sho suya ba kong bakoe. E kjışhko ga woydara ga ïlëbo twe Jesúsde Sbö kong bakoe.

<sup>4</sup>Kjok ère kjing goshko ga syöshtagaga tjok, ga parkë löng ïlëbo twë Sbö kong, tak

ppardj kjoq llgwekklo go sorë li eni. E kjishko ga Jesús sök kjoq ëre kjing go obi kje ga e ber syoshtaga llëme. <sup>5</sup>Syoshtagaga li parkë löng Sbö u jong kjoq ëre kjing go li roshko. E so ba u jong kjoq dogo li kjoyo, gueniyo äär eni llëm, e ba jyäglo erä. E kjishko ga Sbö u shäryak öng kwota go li shärye Moisésdë shäng kjwleshko ga Sbö tjlä ba kong ga «Shäryos yötso. Lläbo jyäglo pinor bop kong dlup go sorë ga shäryos eni» ë. <sup>6</sup>Gueniyo pak twara Jesús kong li, e tjwlo ara, pak shärye syoshtagagarë li kjinmo. E parkë syoshtaga, tjlokwo twara Sbörë tjaqlën, beno iyado wlo li kjishko. Ga tjlokwo ëre tjwlo ara, tjlokwo twara bäm go li kjinmo.

<sup>7</sup>Tjlokwo twara Sbörë bäm go li, llëbo uunkong shäryara pjlu kje ga tjlokwo woyde oblë llëme. <sup>8</sup>Gueniyo ina Sbörë ga nopga li pjlu llëme. Tjlä ga «Tjlapga tjlä ga

“Dbar tjwe kjwara ga  
Israel tjeyoga kong,  
Judá tjeyoga kong,  
tjlokwo twër kjrina obi tjaqlën.

<sup>9</sup>Dënashko ga ba tjlapgaga,  
e orkwo sharor wleni,  
ga shiror tek Egipto kjokyo dwayo.  
Eshko ga tjlokwo tworor ba kong, beno iyado wlo,  
gueniyo kolara lok llëme.  
E kjishko ga tja opkjono ba shwoy dwayo.  
E kjishko ga tjlokwo twër tjaqlën li,  
e ber tjlokwo tworor ba kong dënashko li dik llëme” ë.

Tjlapga tjlä obi ga

<sup>10</sup>“Tjlokwo tworor, beno iyado wlo bäm go li, e pjir.  
E irgo ga tjlokwo twër Israel tjeyoga kong, ber iyado wlo li eni.  
Bor kjoq llgwekklo li tër ber pjang ba wotjlik li go,  
tër ber pjang ba pjlugwo go bakoe.

Tja ber ba Sbö,  
ga epga ber bor nopga bakoe.

<sup>11</sup>Eshko ga tja miyde nopga uunkongdë,  
nopga tjwlo chira äär jong nopga tjwlo ara go.  
E kjishko ga ëye oblë ping bor tjlokwo go ame,  
ëye ba kjlara ichë bor miydë ame bakoe.

<sup>12</sup>Eshko ga owa pjang ba go li lön ber dret,  
ga owa li woyoshrër ame” ë.»

<sup>13</sup>Tjlokwo ëre kowara tjaqlën kuzong ga miydëy e go ga tjlokwo bäm go li iara beno tjwlo ame. Ga llëye këguë, tjwlo llëm ga wop ä ga jeno pjire.

### Sbö u jong kjoq ëre kjing go

**9** <sup>1</sup>Tjlokwo twara Sbörë, beno iyado wlo bäm go li kjibokwoy goshko ga tjlokwo tak lok oblë oblë, beno Sbö poshrëya sorë li miydoklo, ba u kjoq ëre

kjing go shärye sorë li miydoklo bakoe. <sup>2</sup>Eni ga Sbö u shäryara lok kwara öng kwota go. Roshko kjër jong kwara, e kowara lok shto zrek. Eshko ga iök shjij bapkwö jong kwara, ga pjilung shosho suk pjir iak beno tjeng dboy Sbö kong li tjeng ba ioklo jong li kjing go bakoe. <sup>3</sup>U li roshko shwong iak pjang kara kësbange. E pjlor kalëkong kjër jong kwara obi, e kowara lok shto zrek anmoyö. <sup>4</sup>Eshko ga llëbo lö pjilëblë sukklo jong kwara, shäryak dbur sho shöylör go. Sbö tjlokwo woyoshroklo bapkwö poglo shtik dbur sho shöylör go li jong eshko bakoe. Roshko *maná* tjeng sira, ba bapkwö shäryak dbur sho shöylör go li roy, Aarón kjorkung pönglä weno pjlara li buk eshko, ak kwangyo goshko tjlokwo twara Sbörë tak lok li tjeng eshko bakoe. <sup>5</sup>Tjlokwo woyoshroklo bapkwö li kjing go Sbö parkagaga kjok dogo so sjägä tjok wleniyo li jyäglo tjeng do pjök, ba sjägä jyäglo li tjeng tjlokwo woyoshroklo bapkwö kjing dokklo li kopshko, owa pjang nopga go li löya Sbörë lishko. Eni tjok ga llëye lër e kjishko wlo ame.

<sup>6</sup>Llëbo uunkong ëre shäryara lok pjir irgo ga dbar kwjwobi go ga syöshtagaga Sbö kong nopga kjishko li, ba pak li shärye dloyo öötongshko ga opzrëk jek kjër jong bäm go li roshko. <sup>7</sup>Gueniyo ëye opzrëk jek kjër jong këm kwara obi li roshko llëm, syöshtaga kësbangyo li eröe. Lu pjilobi go ga opzrëk jek eshko pjilaraso döe. Ga opzrëk wlo ga öng srëng söya tjeng ba tjok, llëbo owa shäryara om go li potjwlëkklo, llëbo owa shäryara nopgarë miyde löng llëm wleniyo li potjwlëkklo bakoe.

<sup>8</sup>Llëbo uunkong ëre shäryara lok eni, tjlokwo twara Sbörë ba kong bäm go li kjishko. Ère go ga shji pïya Sbö Sëyarë ga tjlokwo bäm go li pjang obishko, Sbö u li jong obishko ga ëye opzrëk jek shto zrek anmoyö lishko ga äe. <sup>9</sup>Eerishko ga miydëy e go ga öng llë tworoy, sho suroy Sbö kong eni ga shji opyë ber löng wotjlik pjlo bek ba bokso e go wlo llëme. <sup>10</sup>Tjlokwo tak lok bäm ëre go ga nopga oppino ië sorë, wë sorë, äär Sbö poshrëk ba ushko ga pjlu wlo. Gueniyo tjlokwo li beno tjwlo tjok, äär jong tjlokwo tjaglën li tjweshko jä.

### Cristo srëng

<sup>11</sup>Gueniyo ga Cristo öör tjän, ga öötong beno shäng syöshtaga kësbangyo bi kjishko. Llëbo pjlu tjeng eerishko kës li söga erë. E parkë Sbö u jong pjlo



*Syöshtaga kësbangyo shäng Sbö tjlokwo woyoshroklo bapkwö zlong (Hebreos 9.1-7)*

bek, pjlú anmoyõ lishko. Sbõ u ère shäryaga norë llëm, e kjok ère so llëm bakoe. <sup>12</sup>Cristo opzrëno jek eshkoshko ga öng srëng söra llëm, shwling ushko so srëng söra llëm, sögla wlënggla srëng söra llëm bakoe. Ba srëng onmo lïra söra jek ba tjok, ga opzrëno jek shto zrek anmoyõ jong eshko li roshko pjaraso, ber sök eshko iyado wlo. Shji döra bi shdungglo dbo dorko dwayo iyado wlo eni. <sup>13</sup>Dënashko ga öng zröraba, sho suraba Sbõ kong, llëbo owa shäryara li potjwlëkklo, ga shwling ushko so srëng, sögla srëng, sögla sho pjono dret, ba pjlungyo, e sguinaba nopga pogo llëbo owa li kjing go, ie ber löng äär Sbõ poshrëk ga pjlú wlo. <sup>14</sup>Cristora pogo llëye dret Sbõ bokso. Ga Sbõ Sëya dbo go ga optwono Sbõ kong, woiono, srëng kwono bi kjishko, owa pjang bi go li löya ber dret wlo. Dënashko ga shji löng woion wlo, llëbo owa shäryoroy li kjishko. Gueniyo shäryara eni, shji ber löng parkë Sbõ Sök iyado li kong wlo. <sup>15</sup>Tjlökwo tjaglën li shäryaga beno Cristorë e kjishko. E woiono, nopga rokara Sbörë li döya ba shdungglo tak pjang tjökwo bäm go li dbo dorko dwayo wlo, llëbo pjlú twe Sbörë ba nopga kong ber iyado wlo lara jlökoyo li kjre lok wlo.

<sup>16-17</sup>Shji löng së obishko ga shji kjibokwo të, ber shji woionoshko ga bi llëbo li ber ë kong li miydoklo wlo. Tjlökwo tjaglën ère, e so kjibokwo e kjoyoe. Kjibokwo li tjwlo tjok wlo ga woyde ga ba taga woiono guing. Shäng së obishko ga kjibokwo li tjwlo llëme. <sup>18</sup>E kjishko ga tjökwo twara Sbörë bäm go li, e tjwlo tjok wlo ga woydara ga öng llë zrökoba, srëng li kwongoba wlo. <sup>19</sup>Tjlökwo uunkong tara kjok llgwekklo kjibokwoyo go li lara Moisésdë nopga kong pjarshko ga sögla wlënggla srëng kjrara sira, shwling ushko so srëng kjrara sira, ga pjöyikong li rorwara di tjok. E irgo ga kjor so shkwë sho kjoyo kowo kjrara kjlëbö, pjrira öng wlëp ushko so zok pjlo srëzrën go, pöra srëng rorwak di tjok li go, ga sguina kjok llgwekklo kjibokwoyo li kjing go, nopga uunkong li kjing go bakoe. <sup>20</sup>Eshko ga tjlë ga «Tjlökwo ère lara Sbörë, beno iyado wlo, shäryëmi wlo. Srëng ère kjishko ga tjökwo li ber tjwlo tjok» ë. <sup>21</sup>Srëng li sguina Sbõ u jong eshko li kjing go, ba llëkso bokso tjeng eshko kës li kjing go bakoe. <sup>22</sup>Srëng kwono llëm ga owa pjang nopga go li löya Sbörë llëme. E kjishko ga epga ichara kjok llgwekklo lirë llëbo ie ber tjeng dboy Sbõ kong wlo ga woyde ga shärye srëng go. Epga ichara ba shäryë eni llëbo uunkong tjok seke.

<sup>23</sup>Llëbo uunkong ère, e llëbo tjeng kjok dogo li jyäglö. E kjishko ga woydara ga ie ber tjeng dboy Sbõ kong eni. Gueniyo llëbo tjeng kjok dogo li ber tjeng dboy Sbõ kong wlo ga woyde ga shärye llëbo tjwlo ara, öng kjinmo li go. <sup>24</sup>Sbõ u jong kjok ère kjing go li, e Sbõ u jlökoyo li jyäglö, e shäryaga norë bakoe. Cristo opzrëno e roshko llëm, opzrëno jek Sbõ u jong kjok dogo li roshko, ga beno shäng eshko Sbõ boksho, shji kjimte wlo. <sup>25</sup>Lu pjlobi ga syöshtagaga këskesyo opzrëk jek shto zrek anmoyõ li roshko, ga öng srëng söya jek ba tjok. Cristora opzrëno jek pjaraso döe. <sup>26</sup>Eni llëm kjwe ga woyde ga zrökoba kop ara, kjok ère shäryara Sbörë tek lëkong. Gueniyo weno shäng pjaraso iyado wlo, optwono woiono, owa pjang nopga go li löya ber dret wlo. <sup>27</sup>Shji nopga woion pjaraso wlo. E irgo ga shji llgweya Sbörë wlo. <sup>28</sup>Eni wleni ga Cristo woiono pjaraso, owa pjang nopga go li

lõya ber dret wlo. Ga llono ga wen jek pjłara obi, gueniyo tjwe shäng owa pjang nopga go li löngga llēm, tjwe shäng ba koshagaga löng li dõga shara.

### Cristo wołono pjłaraso, nopga uunkong kjishko

**10** <sup>1</sup>Kjok llgwekklo tara Moisesdē li, e llēbo wen tjwe pjłū li jyāglo erōe. Llēbo wen tjwe pjłū li, e oblē. E kjishko ga lu pjłobi go ga nopga öng zrök, sho suk, pjē dret Sbō poshrēkklo, tak pjang kjok llgwekklo go sorē li eni ēmdē ga ēye ie ber pjlo bek Sbō bokso ga āe. <sup>2</sup>Epga, owa pjang ba go li löna Sbörē beno dret iyado wlo kjwe ga beno löng pogo llēye dret Sbō bokso. Eni kjwe ga öng zrōya, sho suya ame ga pjłūe. <sup>3-4</sup>Miga owa pjang oba go li löya Sbörē ber dret, sögla llgwoklē srēng kjishko llēm, shwling ushko so srēng kjishko llēm bakoe. E kjishko ga öng zrōya, sho suya lu pjłobi go. E ber epga pogo llēbo owa tjok li miydoklo.

<sup>5</sup>E kjishko ga Cristo shrono shäng kjok ēre kjing goshko ga tjlē Sbō kong ga  
«Öng zrōraba, sho suraba bop kong li woydorop llēm,  
llēbo twaraba bop kong li woydorop llēm bakoe.  
E āska doyo poshāyorop bor kong.

<sup>6</sup>Öng zrōraba, sho suraba, pjono dret bop poshrēkklo li,  
öng zrōraba, sho suraba, llēbo owa shāryaraba li potjwlēkklo li,  
e beno pjłū bop kong llēme.

<sup>7</sup>E kjishko ga tja tjlē ga “Sbō, tja shäng na,  
ga tja shrono shäng llēye woydēp ga shāryēr li, e shāryaga, tak  
pjang bor kjishko bop kjibokwo go sorē li eni” lēr eni” le.

<sup>8</sup>Bām go ga tjlē ga «Öng zrōraba, sho suraba bop kong li, llēbo twaraba bop kong li, öng zrōraba, sho suraba, pjono dret bop poshrēkklo li, öng zrōraba, sho suraba, llēbo owa shāryaraba li potjwlēkklo li, e woydorop llēm, beno pjłū bop kong llēm bakoe» le eni. Tjlēno eni, epga ichara kjok llgwekklo lirē ba shāryē eni gueniyo.

<sup>9</sup>E irgo ga tjlē ga «Tja shäng na, ga tja shrono shäng llēye woydēp ga shāryēr li, e shāryaga» le eni. Eni ga tjłokwo twara Sbörē bām go li kjara, āska tjłokwo tja glēn li shārye wlo. <sup>10</sup>Eni ga Jesucristo wołono pjłaraso nopga uunkong kjishko, woydara Sbörē sorē li eni. Ga shji iara Sbörē beno tjeng dboy ba kong e kjishko.

<sup>11</sup>Syöshtagaga Sbō kong li, ba pak li shārye lok dbar kjwobi go, öng zrōya, sho suya Sbō kong, owa pjang nopga go li löya Sbörē e kjishko llēm gueniyo. <sup>12</sup>Gueniyo syöshtaga bi kong lira wołono pjłaraso, owa pjang nopga go li löya ber dret wlo pjirshko ga öötong sirkeno sök Sbō orkwo kēlēkong.

<sup>13</sup>Eshko tek lēkong ga beno sök ba moskwoga zana Sbörē pjir guing, ga twara beno ba kong iche wlo li koshē. <sup>14</sup>Wołono pjłaraso kuzong ga nopga ie ber tjeng dboy Sbō kong li iara beno pjlo bek Sbō bokso iyado wlo.

<sup>15</sup>Sbō Sēya tjlēno bi kong ēre kjishko bakoe. Tjlē ga

<sup>16</sup>«Tjłokwo tworor, beno iyado wlo bām go li, e pjir.

E irgo ga tjłokwo lēr ba kong jłokoyo li eni.

Bor kjok llgwekklo li tēr ber pjang ba pjlugwo go,  
tēr ber pjang ba wotjlik li go bakoe» le.

17Ga tjlë obi ga

«Llëbo owa shäryara lõk li,  
e woyoshrër ame» ñe.

18Eni ga owa pjang bi go li lõna Sbörë beno dret eni kuzong ga öng zröy, sho suy, llëbo owa shäryoroy li potjwëkklo ame.

### Shji mär Sbö go iyado wlo

19Eni ga pjeyoga, Jesús srëng li kjishko ga shji opzrëk jek shto zrek anmoyö lishko ga pjlu, llëye bangkjrey llëme. 20E wolono li, e irbo tjaglën wleni, ga e go ga shji jek äär Sbö sök lishko ga pjlu, shwong pjang kësband li pjlor kalëkong.

21Cristo öotong beno shäng syöshtaga kësbandyö, shji Sbö nopga kjishko.

22Shji iara beno pjlo bek Sbö bokso, bi wotjlik owa li kjing go srëng sguing wleni, bi doyo wak pjir di drëpdrë go wleni bakoe. E kjishko ga shji to Sbö shwoy, shji mär ba go jlökoyö. 23Tjlökwo laga bi kong jlökoyö li, llëye ñe li shärye eni. E kjishko ga woyde ga llëye koshëy löng li lëy ga miydëy ga eni jlökoyö. 24Shji ëng kjimtë kar kar, shji oblë woydë ara wlo, shji llëbo pjlu shäryë wlo bakoe. 25No kjone kjone tön ëng tjok ame. Shjira omshäryë eni llëm, shji tön ëng tjok, shji ëng kjimtë dbokjrë wlo dey. Ñy ga Tjlapga Jesús tje iröng obi dbaryo li dörö ga woyde ga shäryëy eni jek këgong këgong.

26Tjlökwo bek li miydoroy pjir ga shji jëk löng llëbo owa shäryë obi wleni ga llëbo zröy ber llëbo owa shäryoroy li potjwëkklo wlo oblë drete. 27Shäryoroy eni wleni ga miydëy ga shji ber löng llgweya, shdüya Sbörë iök pjë jong ri ri li go, ba wloyoga tjok li koshë erä. 28-29Dënashko ga ëye, kjok llgwekklo tara Moisésdë li kole woydë llëm ga iga pjökde, myare dö ga zröya lõk jekdo, songe ñe llëme. Ba shdungglo li kjange. Gueniyo ëye, Sbö Wa tjlökwo li kole woydë llëm, e wolono, srëng kwono li iara beno tjlwö llëm, ga Sbö Sëya wotjliño ba kjimtë lara, gueniyo kar läywara owa ga ba shdungglo li ber kjang e kjinmo. 30Miydëy ga Sbö tjlëno ga «Ëye llëbo owa shäryono ga llgweya ber tjarë, shdungga ber tjarë bakoe.» Ga tjlëno obi ga «Tjlapga, e ber ba nopga baiya li llgweya.» 31Sbö sök iyado. Ëye lon ba wloshko, shdüya wlo ga e ba kong ga llëbo pjlu llëme.

32Tjlökwo kuromi, kjroromi kjwëshko ga llëbo weno bomi kong owa kës li, e woyoshrozia. Eshko ga kuromi kjange. 33Olö ga pjäy läywaraba owa nopga uunkong bokshto, pjäy shdunaba ara eni bakoe. Ga bomi pjeyoga kong llëbo shäryaraba eni li ñnoma ga pjäy tönö ba tjok, llëye bangkjroromi llëme. 34Sbö nopga löng kjërshko li songe loromi. Bomi llëbo döraba bomi shjiryoshko ga kuromi löng wopjlu, miydoromi ga pjäy llëbo tjeng kjok dogo pjlu anmoyö, pjir llëm wleniyo kjishko.

35Eni ga pjäy wosonkë llëm, pjäy mär Sbö go iyado dey. Shäryoromi eni ga pjäy potjwëya ara. 36Llëye wen bomi kong owa ga kumi kjange. Eni ga llëye woyde Sbörë li shäryoromi eni ga llëye twe ba nopga kong lara li, e kjrëmi jlökoyö, 37tak pjang ba tjlökwo go sorë li eni. Tjlëno beno eni:

«Ëye tje ñe ga tje jlökoyö,

tjwe döröe.

<sup>38</sup>Ëye mär bor go ga  
era ber pjlo bek bor bokso.

Gueniyo mär bor go ame wleni ga  
tja ber shäng wopjlú ba tjok llême.»

<sup>39</sup>No kjone kjone mär ba go ame, ga llono ga pjir. Shji baíya dik llême.  
Shji mär ber löng ba go, ga llono ga shji där.

### Shji mär Sbö go

**11** <sup>1</sup>Shji mär Sbö goshko ga lléye igöy llém li, e koshëy, ga miydëy ga llono ga shäryë eni jlökoyo lëy. <sup>2</sup>Bi tjlapgaga tek dënashko so mär ba go kjishko ga Sbö beno wopjlú ba tjok.

<sup>3</sup>Shji mär Sbö go kjishko ga miydëy ga kjok shäryara uunkong ba tjlokwo go, llébo iy löng li shäryara llébo igöy llém li go.

<sup>4</sup>Dënashko ga Abel mär Sbö go kjishko ga llébo sura ba kong pjlu, llébo sura Caíndë li kjinmo. Mär ba go kjishko ga beno pjlo bek ba bokso, ga Sbö beno wopjlú ba tjok, llébo sura li tjok bakoe. Ga wołono ëmdë ga mär ba go kjishko ga shji opping ba go ga pjlu obi.

<sup>5</sup>Dënashko ga Enoc mär Sbö go kjishko ga to söra kjok ëre kjing go dwayo, wołono llême. Wlénaba llém, söra kjishko. Söyde llém obishko ga llébo shäryara beno pjlu Sbö kong. <sup>6</sup>Ëye mär Sbö go llém ga llébo shärye ber pjlu ba kong ga äe. Ëye äär Sbö shwoy wlo ga woyde ga woyotjlíya ga sök jlöe le guing, woyde ga woyotjlíya ga ëye omwlék ga potjwléya jlöe le guing bakoe.

<sup>7</sup>Dënashko ga Noé mär Sbö go kjishko ga Sbö tjléno ba kong llébo iyde llém obi li kjishkoshko ga tjlokwo kjrara, Sbö bangkjrara, ga kjoyng shäryara kësbang, ba pjeyoga dökklo. Eni ga nopga löng kjok ëre kjing go li iara beno löng shdüya Sbörë wlo, gueniyo Noéra iara beno pjlo bek ba bokso.

<sup>8</sup>Dënashko ga Abraham mär Sbö go kjishko ga ichara to kjok shto oblë twe ber ba kong lishkoshko ga kolara, ga to kjone miydara llém ëmdë ga opshino jeke. <sup>9-10</sup>Ga mär Sbö go kjishko ga öötong beno sök kjok twe ba kong lara lishko, no shto oblë so wleni. Kjok buk kjrina kjok dogo, shäryaga Sbörë ber iyado wlo. Kjok li koshara Abrahamdë, äär ber sök eshko wlo. E kjishko ga sök kjok ëre kjing go obishko ga beno sök kjok shto oblë oblë u shäryak öng kwota go roshko. Ba wa Isaac, ba tjër Jacob, e omshäryono eni bako, tjlokwo lara Sbörë Abraham kong jlökoyo li twara ba kong lok eni bako kjishko. <sup>11</sup>Ga Abraham mär Sbö go kjishko ga tjlablëshko ga ba boy Sara kjröng ëmdë ga wa buk kjlara. Wa twe ba kong lara Sbörë ba kong jlökoyoshko ga tjlokwo kjrara domer lirë, miydara ga lléye le li shärye eni iyado kjishko. <sup>12</sup>Eni ga luyo ara, wołon to ëmdë ga ba tjëyo tek beno ba irgo li shdöktong träk llém, dbala lok kjopkwo go wleni, la sho tjeng dlung kjako wleni bakoe.

<sup>13</sup>Nopga uunkong ëre wołonoshko ga llébo twe Sbörë ba kong le jlökoyo li kjrara lok llême. Gueniyo mär Sbö go kjishko ga ina lok pjola dwayo wleni, ga

beno löng wopjílú e kjíshko. Löng kjok ère kjing go obishko ga tjìlè oba kong ga epga om go lì shto oblè so wleni, kjok ère so llème le löng eni. <sup>14</sup>Miydëy e go ga to löng kjok wlek, ber baíya jlókoyo wlo. <sup>15</sup>Tek opshino kjokyo baíya lì woyotjlíyde löng kjwe ga san jek iröng obi ga pjíúe. <sup>16</sup>Gueniyo kjok buk kjrina kjok dogo pjíú anmoyö wleniyo lì wléyde löng. E kjíshko ga kjok sháryara Sbörè ba kong eni, ga «Pja borwa Sbö» le lok ba kongshko ga lökyokjre Sbörè llème.

<sup>17-18</sup>Abraham mär ba go jlökoyore miyde Sbörè wlo ga ichara ba wa kjílaraso lì zrök, sho suk ba kong, ba tjíkklo. Bám go ga Sbö tjìlè ba kong jlókoyo ga «Isaac tjëyo tek ber ba irgo lì ber bop tjëyo jlókoyo eröe» le. Eni èmdè ga mär Sbö go kjíshko ga wotjílno ba zrök lara. <sup>19</sup>Wotjílík ga woshre Sbörè iröng obi ga pjíúe le, ga wlojkrara iröng obi, woiono, woshrara iröng obi wleni.

<sup>20</sup>Dënashko ga Isaac mär Sbö go kjíshko ga tjíleno beno pjíú ba wapga Jacob, Esaú kong, lléye wen ba kong llono lì kjíshko.

<sup>21</sup>Dënashko ga Jacob mär Sbö go kjíshko ga woion döröshko ga tjíleno beno pjíú José wapga kong. Eshko ga kojono shäng ba kjorkung go, ga Sbö poshrëra.

<sup>22</sup>Dënashko ga José mär Sbö go kjíshko ga woion döröshko ga Israel tjëyoga ichara beno ba doyo sök ba tjok, epga opshik jek Egipto kjokyo dwayo dbaryo lishko.

<sup>23</sup>Dënashko ga Moisés data, meké, e mär Sbö go kjíshko ga chida lì jnena öötong moglo mya. Ina lok ga wolesowa, ga tjílkwo lara pjíurè lì bangkjrara lok llème.

<sup>24</sup>Moisés mär Sbö go kjíshko ga öötong këguè ga kuna pjíú wa walè lirè èmdè ga woydara ga kowèba ba wa llème. <sup>25</sup>Woydara ga ber shäng wopjílú dbar kjwöbö, llébo owa sháryara kjíshko llème. Eni ga opyono beno shäng shdungoba Sbö nopga tjok shara. <sup>26</sup>Beno shäng potjwléya Sbörè lì koshè. E kjíshko ga ba kong ga shdungoba Cristo kjíshko lì tjwlo ara, llébo tjwlo ara tjeng Egipto kjokyo kës lì kjinmo. <sup>27</sup>Mär Sbö go kjíshko ga to Egipto kjokyo dwayo, pjíú iirkè ba kong lì bangkjrara llème. Eshko ga miyde ga Sbö igöy llèm lì jek shäng ba tjok. E kjíshko ga sano iröng llème. <sup>28</sup>Mär Sbö go kjíshko ga Israel tjëyoga döktong tek Egipto kjokyo dwayo dbaryo shrèkklo lì sháryara, ga nopga ichara öng wlep ushko so zrök, ga srèng sguing u bäng bäng worbo shakklo lì go, Israel wapga domerga bäm iyo lì zröya no pjiga lirè llèm wlo.

<sup>29</sup>Dënashko ga Israel tjëyoga mär Sbö go kjíshko ga dipzono tek Dlång Srèzrèn kjwo na lèkong, jek löng kjok dogro kjing go wleni. Gueniyo Egipto sopga omsharyè eni wlo larashko ga shteno lok drete. <sup>30</sup>Ga Israel tjëyoga mär Sbö go kjíshko ga dbar kjwobi go ga Jericó kjokyo kopjrina lok pjiribri shtök öötong dbargwo kjäk (7). E irgo ga kjok lì kjëryo sháryak ak go lì dlöktong, sho ter löno töshko.

<sup>31</sup>Eshko ga walè shäng kjílara ko Rajab, to shäng opsoynek domerga oblè oblè kong wleniyo. Mär Sbö go kjíshko ga kjok igaga öötong ba shwoy lì wlojkrara. E kjíshko ga nopga Sbö kolono llèm lì zrörabashko ga era zröraba llème.

<sup>32</sup>¿Lléye lër obi ga pjíú? Dbar tjok obi kjwe ga Gedeón, Barac, Sansón, Jefté, David, Samuel, Sbö tjílkwo lagaga, e lanyotkër bomi kong bakoe. <sup>33</sup>Mär Sbö go



kjishko ga llëbo shäryara ba kong oblë oblëe. Kjone kjone engkjwono pjilupga dbo ara wleniyo tjok, ga zanae. Kjone kjone nopga ichono pjlo bek. Kjone kjone, llëbo twe Sbörë ba kong lara jlökoyo li kjrara. Kjone kjone dbong kjamo llino. <sup>34</sup>Kjone kjone, iök pjë jong träk llëm ga sjëra. Kjone kjone zrökoba dröng go lëbashko ga döktonge. Kjone kjone dbo llëm ga öötong beno dbo ara. Kjone kjone engkjwëshko ga dbokjrono ara. Kjone kjone, engkjwagaga shto oblë so zana songe. <sup>35</sup>Walëga kjone kjone, ba pjeyoga wolono li woshrono iröng obi.

Kjone kjone shdunaba ara, ga zröraba, gueniyo opdök woydë llëm, llono ga woshre Sbörë iröng obi li ber pjlu anmoyö ba kong wlo. <sup>36</sup>Kjone kjone laywaraba owa, shporaba no shpokklo go bakoe. Kjone kjone pjiraba dröng sho go, iaraba beno löng kjërshko. <sup>37</sup>Kjone kjone zröraba ak go. Kjone kjone zaraba tas do worbëshko. Kjone kjone zröraba dröng go. Kjone kjone to löng llaw pogo, doyono öng kwota go, dbur llëm, shdunaba ara, wosong iyado. <sup>38</sup>Nopga eniyo tjwlo ara, nopga Sbö miydë llëm wleniyo li kjinmo anmoyö. To löng kjok dogro no llëmshko, dlup go bakoe. Beno löng gueng jong ööng roshko, klung ööng roshko bakoe.

<sup>39</sup>Nopga uunkong ëre mär Sbö go kjishko ga Sbö beno wopjlu ba tjok, gueniyo llëbo twe Sbörë ba kong lara jlökoyo li kjrara llëme. <sup>40</sup>Shäryono eni, woydara Sbörë ga llëbo ber bi kong pjlu anmoyö kjishko. Epga ie woydë ber pjlo bek ba bokso, gueniyo ie woydë ber eni bi tjok bakoe.

### Sbö, ba wapga llgweya

**12** <sup>1</sup>Epga mär Sbö go kjishko ga pak twara ba kong li shäryara lok pjire. Shji opping mär Sbö go ba kjishko ga pjluë. E kjishko ga pak twara bi kong li shäryë äar jong ba dbo go, shji sjen llëme. Llëbo lok bi go kwing ara, bi sengglo wleni li döy, ga rayëy. Llëbo owa, shji iche jëk pjlu llëm li rayëy bakoe. <sup>2</sup>Jesús woyotjlydë eröe. Bi iaga ber löng mär Sbö go li e, ga shji mär ber löng ba go iyado ba kjishko bakoe. Lök pjang kjlös goshko ga kura kjinge. Wolon eni li lökyo ara ëmdë ga lökyotkara llëme. Llono ga ber shäng wopjlu sorë li woyotjlyde pjang eröe. E irgo ga öötong sirkeno sök Sbö tjok, ba orkwo këlekong. <sup>3</sup>Llëbo shäryara nopga owarë ba kong ara ga kura kjinge. Eni ga e woyotjlyzi iyado, pjäy sjen llëm wlo, pjäy wosonkë llëm wlo bakoe.

<sup>4</sup>Pjäy drön löng ara, pjäy opkjë llëbo owa lishko dwayo wlo, gueniyo pjäy zröydëba e kjishko llëm obi. <sup>5-6</sup>Gueniyo tjlokwo lara Sbörë beno ba wapga kong kjrina. E woyojeromi tjän. Tjlëno beno eni:

«Pja bor wa.

Ëye woyde Tjlapgarë ara ga llgweya, opping wlo.

Ëye kjrara beno ba wa wleni ga shdüya.

E kjishko ga pja llgweyashko ga

ios ber tjwlo ara, pja opping wlo.

Pja wloyashko ga

pja wosonkë llëme.»

<sup>7</sup>Wapga uunkong ñlgweya ba datarë, opping wlo. Eni ga ñlëbo wen bomi kong owashko ga miydozi ga pjäy ñlgweya Sbörë shäng, pjäy opping wlo. Shärye bomi kong eni, pjäy ba wapga kjishko. <sup>8</sup>Ba wapga ñlgweya uunkong. Eni ga pjäy ñlgweya ñlëm wleni ga pjäy ba wapga jlokooyo ñlëme. <sup>9</sup>Bi dataga löng kjok ëre kjing go li, shji ñlgweya, ga bangkjërë e kjishko. Eni ga shji ñlgweya bi Data, bi iaga beno löng së jlokooyo ñrëshko ga woyde ga kolëy. <sup>10</sup>Shji ñlgwera bi dataga löng kjok ëre kjing go ñirë dbar kjwöbö, woydara ga ber pjlu bi kong kjishko. Gueniyo shji ñlgweya Sbörëshko ga era pjlu bi kong iyado, shji äär ber löng pjlo bek baiya dik wlo. <sup>11</sup>Shji ñlgwekobashko ga shji löng wopjlu ñlëm, shji löng woowa. Gueniyo shji oppino e go wleni ga shji ie ber löng jëk pjlo bek, wlep bakoe.

<sup>12</sup>E kjishko ga pjäy opyos wokjang, pjäy so no jëk ga dre dbo ñlëm, kjrëk kjrëk erä li kjoyo ñlëm wlo. <sup>13</sup>Pjäy wotjlik jëk pjlo bek erä, nopga mär Sbö go jlokooyo ñlëm li opping jëk pjlo bek wlo, e raye ñlëm wlo.

### Sbö tjlokwo kuy yötso

<sup>14</sup>Pjäy drön ëë, pjäy ber löng wlep nopga uunkong tjok wlo. Pjäy jëk pjlo bek erä. ñlëm ga Tjlapga ñmi ñlëme. <sup>15</sup>Sbö wopjlu li wlokjrozi pjäy uunkongdë, rayëmi ñlëme. Pjäy kjlara wotjlik owa wleni ga nopga ara iche wotjlik owa eni bako ga pjluë. Pjäy sjëk, e shäryë eni ñlëm wlo. <sup>16</sup>Shji orkwosmono ë tjok ñlëm ga shji pë ba tjok ñlëme. Sbö bangkjroziä. Shji opshäryë Esaú dik ñlëm bakoe. Dënashko ga Sbö bangkjrara ñlëm kuzong ga ba wa këguëyo shtoyo li soynena dli kjrina kjishko. <sup>17</sup>Miydëmi pjlu ga e irgo ga woydara ga ba data tjle ber pjlu ba kong, gueniyo jlo ñara ñlëme. Slatong ara ëmdë ga ñlëye shäryara li kjlopswe obi ga äe.

<sup>18</sup>Pjäy öötong löng Sbö shwoy, Israel tjëyoga dik ñlëme. Epga öötong löng dlup jong kwara lishko. Dlup li porwako ñlëm, pjë jong ri ri bakoe. Eshko ga kjok ro yët, pjluk ara bakoe. <sup>19-20</sup>Wli pjlukyo kura lok. Eshko ga Sbö tjle ba kong lok ga «Ëye dlup jong ëre porwono ga e zrökko jekdo ak go, öng ñlë ëmdë ga omporwono ga e zrökko eni bakoe» ñe. Kuya lok ga bangkjrara lok ara, tjlokwo beno ba kong kjang anmoyö kjishko. E kjishko ga kjloshtono lok ara, ñlëye ñe ba kong ame wlo. <sup>21</sup>Moisés ëmdë ga ñlëye ñna li bangkjrara ara bakoe. Tjle ga «Bangkjrër shäng dete erä» ñe.

<sup>22</sup>Gueniyo kjok buk kjrina kjok dogo ko Jerusalén, e buk Siön dlupyo jong eshko li go. Kjok ëre, e Sbö Sök Iyado li i. Eshko ga ba parkagaga kjok dogo so töno löng träk ñlëm, wopjluë. Pjäyda öötong löng kjok eshko wleni. <sup>23</sup>Jesús tjlokwo kjrägaga woyde Sbörë ara wleniyo löng eshko uunkong, ko tak lok kjok dogo li epga. Ga pjäy töno beno tjeng ba tjok lok eshko Sbö bokshto wleni. Nopga uunkong ñlgwega li e. Nopga jëktong löng pjlo bek dënashko li iara Sbörë beno pjlo bek ba bokso, ga ba sëya li löng eshko. Ga pjäy töno beno tjeng ba tjok wleni. <sup>24</sup>Pjäy öötong löng Jesús shwoy wleni bakoe. Tjlokwo tjaglën shäryaga li e. Ba srëng kwona li kjroromi, owa pjang bomi go li löya Sbörë ber dret e kjishko wlo. Srëng ëre tjwlo ara, Abel i li kjinmo.

<sup>25</sup>Pjäy sjëke. Sbö tjëlë bomi kongshko ga kuzĩ yõtso. Dënashko ga tjëlëno Israel tjëyoga kong kjok ëre kjing go dwayoshko ga kura ðok ðlëm kuzong ga epga shduna. Eni ga tjëlë bi kong kjok dogo dwayoshko ga kuy ðlëm wleni ga jðokoyo ga shji shdüya bakoe. <sup>26</sup>Tjëlëno dënashkoshko ga klung iano jek dete erä. Gueniyo eerishko ga tjëlë bi kong jðokoyo ga «Llono ga klung iër ian jek obi, kjopkwo iër ian eni bakoe» ðe. <sup>27</sup>Miydëy e go ga kjok shäryara kës li, e kje eshko, gueniyo ðlëbo wir ðlëm li, era ber iyadoe.

<sup>28</sup>Sbö sök no pjlyuo iyado kjokyo li, e wir ðlëme. Ga llono ga shji äar ber löng eshko iyado wlo. E kjishko ga shji wopjlú ba tjok dey, ga woyde ga poshrëy, bangkjrëy, woyde sorë li eni. <sup>29</sup>«Bi Sbö, e iök kjok pjikklo wleni.»

### Kjibokwo pjirzlong

**13** <sup>1</sup>Pjäy ëng woydos ara kar kar, epenga dö wleni iyado. <sup>2</sup>Nopga miydëmi ðlëm wleniyo äar bomi shwoyshko ga wlokjrozĩ löng wopjlúe. No kjone kjone omshäryono Sbö parkagaga kjok dogo so kong eni, miydara ðok ðlëm gueniyo. <sup>3</sup>Nopga löng kjërshko li woyoshrozĩ, pjäy löng ba tjok eshko wleni. Nopga shdungoba löng li woyoshrozĩ, pjäy shdungoba löng ba tjok wleni.

<sup>4</sup>Pjäy orkwosmok löng pjir, tjëlökwo loromi ëng kong jðokoyo li bangkjrözia. Pjäy pë bomi lanma, bomi boy tjok eröe. Èye pë no orkwosmono ba tjok ðlëm li tjok ga shdüya Sbörë.

<sup>5</sup>Sbö tjëlëno bi kong ga  
«Pjäy rayër ðlëm,  
pjäy kjimtër iyado» ðe.

E kjishko ga shji dbur woydë ara ðlëm, pjäy wopjlú tjeng li tjok dey. <sup>6</sup>Eni ga shji tjëlë ga

«Tjlapga, e bor kjimtaga.  
E kjishko ga  
ðlëye shärye nopgarë bor kong li,  
e bangkjrër ðlëme» ðey eni.

<sup>7</sup>Sbö tjëlökwo roy ðara bomi kägäyogarë bomi kong. E kjishko ga epga woyoshrozia. Epga jëktong löng mär Sbö go sorë li, e woyotjlizi, ga pjäy omshäryos eni bakoe.

<sup>8</sup>Jesucristo, e dënashko sorë ga eerishko ga eni, ga ber eni iyado. <sup>9</sup>E kjishko ga tjëlökwo oblë læba bomi kongshko ga jðo læmi ðlëme. Shji dbo ara wlo ga woyde ga shji mär Sbö wopjlú li go, shji mär kjok ðlgwekklo, shji iche dli oblë oblë uë ðlëm li go ðlëme. Era ðlëno ðlëme. <sup>10</sup>Syöshtagaga Sbö kong ba pjeyoga kjishko parkë löng Sbö u jong li, öng zröya, sho suya Sbö kongshko ga sjëngna li ue ðok ga pjluë. Jesús, e bi kong öng zröraba, sho suraba Sbö kong wleni, gueniyo e ber syöshtagaga li kong ðlëme.

<sup>11</sup>Syöshtaga kësbangyo opzrëk jek shto zrek anmoyö roshkoshko ga öng zröra li srëng söya jek ba tjok, ðlëbo owa shäryara nopgarë li potjwlekklo, gueniyo öng doyo beno tjeng li sökoba pjola, sukoba u ðlëmshko. <sup>12</sup>Eni wleni ga Jesús, e söraba

jek kjok eshko li kjoko shwo lëkong, ga shdunaba, zröraba u llemshko bako, nopga ie ber löng pjlo bek Sbö bokso ba srëng go wlo. <sup>13</sup>Eye wolono eni ga lökyo ara lëba. Woyde ga shji to jek ba shwoy, shji läywëba owa e kjishko gueniyo. <sup>14</sup>Kjok ëre kjing go ga shji kjok buk iyado wlo drete. Gueniyo shji löng kjok eniyo tjwe li koshe.

<sup>15</sup>E kjishko ga shji kjimtaga ber Jesúsdë, Sbö poshrëy iyado wlo, shji mär Cristo go lëy iyado wlo bakoe. E ba kong ga öng zröroy, sho suroy, pjono dret ba poshrëkklo wleni. <sup>16</sup>Gueniyo lëbo pjlu shäryozï iyado, öblë kjimtozï bomi lëbo li go iyado bakoe. Shäryoroy eni li, e Sbö kong ga öng zröroy, sho suroy, pjono dret ba poshrëkklo wleni.

<sup>17</sup>Sbö tjlokwo kjraga kägäyoga, e kolozia. Epga iara Sbörë beno löng bomi daga, ga lono ga iche ba dboryë, lëbo shäryara kës li kjishko. Epga kolozï, ba pak li shärye lok wopjlu wlo. Eni llem ga ba pak li ber kjang ba kong, ga era ber pjlu bomi kong lëme.

<sup>18</sup>Pjäy syöshtos Sbö kong borwa kjishko. Miydërwa pjlu ga tjawa opshäryë löng pjlo bek Sbö bokso lërwa eni borwa pjlu shko, ga tjawa drön ara, lëbo pjlu miydërwa li shäryërwa eni iyado wlo. <sup>19</sup>Rokër bomi kong ga pjäy syöshtos Sbö kong, tja kjimte jek bomi ik wop ä iröng obi wlo.

<sup>20</sup>Bi Tjlapga Jesucristo wolonoshko ga woshrra Sbörë iröng obi, ga ba srëng kwona li go ga tjlokwo shäryara kjrina, ber iyado wlo. Öng wlëp ushko so daga kësbang li e. Shji iaga ber löng wlëp li e bakoe. Eni ga rokër ba kong ga <sup>21</sup>lëbo twe bomi kong uunkong, lëye woyde ga shäryëmi wlo li shäryëmi ga pjlu wlo. Rokër ba kong obi ga Jesucristo kjishko ga lëye shärye woydë borwa tjok li, e shärye eni. Jesucristo, e poshrëy, iëy ber kësbang, tjwlo ara iyado wlo. Ber eni.

<sup>22</sup>Pjeyoga, kjibokwo toror bomi kong ëre, pjäy dbokjrë e go wlo, ga kjibokwo ëre tjlokwoyo ara lëme. Eni ga rokër bomi kong ga tjlokwo kjrozia.

<sup>23</sup>Bi kjlara Timoteo, e döktong kjërshko dwayo tjän. Lër bomi kong miydëmi wlo. Tjwe iröng maling ga sör jek bor tjok bomi ik.

<sup>24</sup>«¿Yonde?» lëmi bomi kägäyoga kong. «¿Yonde?» lëmi Sbö nopga uunkong kong bakoe.

«¿Pjäy yonde?» lë Italia sopga lirë bomi kong.

<sup>25</sup>Rokër Sbö kong ga ba wopjlu li kjishko ga pjäy kjimte ara.